

Diadomingo 27 di november 2016

Bin sinti e dushi ambiente di Pasco cu Concierto Dominical Donny Laclé

DIADOMINGO, dia 27 di november lo tuma luga e ultimo Concierto Dominical di e añu aki. Manera ta costumber for di januari di e añu aki e concierto ta tuma luga den “Café Musical” na Biblioteca Nacional na Playa for di 11’or di mainta pa 1’or di merdia.

E biaha aki e comision organizado a hinca un bunita programa di Pasco den otro cu presentacion di diferente cantante y musico. E concierto ta habri cu Melange, un grupo coral di adulto bou direccion di Maybeline Arends-Croes. Ademas di ta canta regularmente durante celebracion eucaristico na Misa den weekend y riba dianan di fiesta di misa, nan por a disfruta tambe di e bunita voz di e cantantenan durante diferente actividad cultural y social.

Ultimamente na e show di homenahe na Rudy Plaate y Norman Moron. E grupo lo canta pa nos diferente canticanan di Pasco conoci.

Siguientemente nos ta haya presentacion di un grupo, di gran parti hoben, bou guia di Rubin Ponson. Melodia e añu aki ta celebra su prome lustro.

Den nan 5 añu Melodia a cosecha hopi exito y a logra produci no menos cu 10 disco compacto.

E ultimo “Ban Celebra” lo ta obtenibel den pausa of despues di e concierto diadomingo 27.

Nan lo trece pa nos musica tipo gaita di nan mes composicion, compaña pa e bunita sonido di entre otro un mandolin.

Den pausa, Fundacion pa Talento Musical Donny Laclé lo entrega 15 “scholarship” na diferente hoben talentoso tanto pa haya les di diferente instrumento musical como di canto.

E ultimo grupo Nueva Sabor Musical, ta existi awo mas o menos un añu, y ta consisti di 5 musico y tocado di diferente edad

kendenan a yega di toca den diferente otro banda. Nan ta pone nos balia rib’e ritmo di cantican di Pasco.

Wel, diadomingo 27 di november tur hende ta bonbini pa bin pasa un rato dushi den ambiente di Pasco na “Café Musical”. Entrada ta gratis, pero un donacion den e caha di glas cu ta pasa rond, ta hopi bonbini pa yuda nos musiconan hoben y talentoso den nan futuro carera musical. Nos ta topa!

